

95
A R V R A N

HAC

A L L O U A R N .

Eun devez mestrez Brân , clujet var eur vezen ,
A zalc'he en he beg eur pez patatezen ;
Alanic al Louarn , ar c'hoez mad pa zantas ,
Eguis eur c'hànjoler dezi a lavaras ,
Var ton tra la la-la-la , var ton tra la la-la-la ,
Var ton tra la deri dera la-la-la.

— Bonjour dèc'h , itron Brân : penos a reomp-ni ?
— Eleal , mestr Louarn , brao avoalc'h oun. Na c'houi ?
Va bugale ive , sepet an diveza ,
A zo gant ar c'hocluch pemzec dez zo dija ,
Var ton tra la la-la-la , var ton tra la la-la-la ,
Var ton tra la deri dera la-la-la.

— O Brân ! peguer caer oc'h gant ho robe hep pris !
C'houi oc'h eus sur laqet e ober en Paris ?
— Ia , eme ar Vrân , carguet a fouguerez :
Hac e ro da anaont ty he c'hemenerez ,
Var ton tra la la-la-la , var ton tra la la-la-la ,
Var ton tra la deri dera la-la-la.

— A feiz ! mar deo ho mouez hanval ouz ho tillad,
C'houi a dle anfonci an oll ganerien vad.
Grit din eta clêvet ho mouez qer magnific ;
Rac ebars ho famill' voar erên var ar music,
Var ton tra la la-la-la, var ton tra la la-la-la,
Var ton tra la deri dera la-la-la.



Qerqent an itron Brân, hep beza re bedet,
A c'hrosmol dre he fri *An Tour dantelezet* ; (*)
Mes dre ma ranq he beg digueri da gana,
Ar batatezen zo lêzet prest da goeza,
Var ton tra la la-la-la, var ton tra la la-la-la,
Var ton tra la deri dera la-la-la.

Ractal mestr Alanic, a gonte mad var ze,
Var ar batatezen a zaill diouc'h-tu neuze.
Evel eun tord e c'hoarz, an tam mastin fripon,
En eur frota e gôf, ha joaüs e galon,
Var ton tra la la-la-la, var ton tra la la-la-la,
Var ton tra la deri dera la-la-la.

Trêi a ra ouz ar Vrân, hac e lavaras dêi,
O tont d'e c'haqetal hac ober goab anêi :
Me meus ho trappet brao ! Vil e zeo ho tillad :
Ne ouzoc'h qet cana..... Ho patatez zo mad,
Var ton tra la la-la-la, var ton tra la la-la-la,
Var ton tra la deri dera la-la-la.

O clêvet an dra-ze, ar Vrân maleüruzez
A zo despitet oll, confonetet gant ar vez.

(*) Chanson all, composet gant A. LEDAN.

Oh ! perac e teuer an duel da zifen !
M'em bije da lazet gant eun tenn pistolen ,
Var ton tra la la-la-la , var ton tra la la-la-la ,
Var ton tra la deri dera la-la-la.

An oll lapousset all , o clêvet comz ouzin ,
A deuyo d'am goapât bremâ dindan va min....
Me , mestrez ar Brini ! trappet gant Alanic ,
A vo sellet bremâ' vel eul Laouenanic !
Var ton tra la la-la-la , var ton tra la la-la-la ,
Var ton tra la deri dera la-la-la.

Clêvit ar voralen eus ar c'houplejou-mâ ;
Brini , bras ha bian , va zelaouit amâ :
Pa vo leun ho qinou demeus a batatez ,
Serrit ervad ho peg , ha grit tevel ho mouez ,
Var ton tra la la-la-la , var ton tra la la-la-la ,
Var ton tra la deri dera la-la-la.

7^t Güengolo 1848.

A. LÉDAN.



E Montroulez , eus a Imprimeri LÉDAN.

